

Regiuns da sanadad èn ina necessitad

La regenza respunda ad ina dumonda da deputà Phillip Gunzinger (pld Scuol)

DA MARTIN CABALZAR

■ **Dacurt ha la regenza preschentà in model directiv concernent il provediment da sanadad dal chantun Grischun. En ina dumonda parlamentara vul deputà Phillip Gunzinger (pld Scuol) savair da la regenza tge reacziun che quest model ha effectuà e co che l'urari per realisar las mesiras previsas en quest model sa preschenta.** En general saja quest model directiv che mussa co las structures dal provediment da sanadad ston vegnir concepidas en l'avegnir vegnì percepià a moda fitg positiva, constatescha la regenza. Reacziuns concretas positivas haja dà cunzunt sin las mesiras previdas dal departament respunsabel per la creaziun planisada da regiuns da provediment da la sanadad ed areguard ils impuls per furmar ina suletta instituziun respunsabla per mintga regiun da provediment da sanadad.

Lantschà la discussiun

Sco la regenza constatescha è la discus-

siun lantschada cun la publicaziun dal model directiv in emprim pass per realisar las mesiras previsas. Las prestaziuns d'utilitad publica dals ospitals vegnian indemnisadas gia oz en moda adequata, perencunter stoppia la repartiziun dal credit global sin ils ospitals eventualmain vegnir adattada. Er il provediment ambulandant garanteschia il chantun gia oz en il rom da sias pussaivladads. En il rom da lur capacitads persunalas sustegnian il departament e l'uffizi da sanadad tut las activitads che gidan a furmar regiuns da sanadad. Tenor la planisaziun actuala vegn suttamess al cussegl grond l'onn 2016 in project per realisar las mesiras previdas en il model directiv per furmar regiuns da sanadad.

Different da regiun tar regiun

Sco la regenza constatescha variescha il stadi actual dal svilup organisatoric fitg da regiun tar regiun. Entant che regiuns d'ospital sco la Val dal Rain grischuna ha 26 instituziuns respunsablas, la Surselva 14 e la Mantogna/Tumleatga/Val-

ragn/Alvra otg en quellas reunidas en Partenz e Val Müstair en ina suletta organisaziun ed en Engiadin'Ota, Engiadina Bassa, Tavau, Surses e Bregaglia duas, Puschlav trais, Mesauc/Calanca tschingt instituziuns. Sco la regenza scriva saja la necessitad d'agir la pli gronda là nua ch'igl a numerusas instituziuns sin quest sector sco en la Val dal Rain, en Surselva sco er en la regiun Mantogna, Tumleatga, Valragn, Alvra ed en la regiun Mesauc/Calanca. Per la regiun da Cuiria posia questa constataziun dentant vegnir relativada. Sco menziunà en quest model directiv vegn la regiun d'ospital da Cuiria – pervi da sia grondezza – dividida per motivs pratics en subregiuns per las chasas da personas attempadas e da tgira sco er per ils servetschs da la spitex.

En las regiuns dal Partenz e da la Val Müstair saja gia vegnida cuntanschida la finamira dal departament, numnadament che las prestaziuns d'ospital, spitex e chasas d'attempads e da tgira vegnan furnidas ed organisadas en tut ils secturs tras in sulet purschider.



En Partenz ed en Val Müstair (foto) è il model directiv per il provediment da sanadad sut in tetg organisatoric gia realisà.

FOTO N. PITARO